

# XOTA

## Xota Iokanatsopatakiti

---

<sup>1</sup>Nota Xota. Xesosi Kristo nitiri amotakori nitxaua. Txiako itari nitxaua. Niokanatsopata kãkitimoni, Teoso akiritakinimoni, Teoso aĩri tiretakinimoni. Xesosi Kristo nĩkatakiniimoni niokanatsopata.

<sup>2</sup>Teoso iteene amonĩkai. Itene ikamaerekaxiniretai. Itene itiretai.

### Atã Minakati Oerekakani

<sup>3</sup>Hĩte nota tiretakini, Xesosi makatxakapekari himaerekani, nota maerekani apaka. Ninirekamari niõkatsopatiniri amaerekani makatxakiko pirena hĩtemoni. Iuanoka ninireka niõkatsopatini, txamari nixinikari erekape ãtião niõkatsopatini. Ninirekari nõtãkikinii. Teoso oerekakiti sãkiretxiti inakitiakorimoni isikakiti hinĩkaenetariko. Teoso oerekakiti ikinika isikapekari inakitiakorimoni. !Hãuiritapiri apanakini koketiniri ikara ninoa oereẽkitikata.

<sup>4</sup>Hĩte Xesosi sãkire auiãkani sauaki aua Teoso mapaxitakani. Merepanika ninoa apotiitakasaakiua hĩtekata, !himarotari kamisrienererini ininiuana. Ninoa koketari isãkirena Teoso sãkirekata. Ninoa sãkire: “Ate sirĩka anireẽkitokata, kotxi Teoso katiraõkiri, ininiã iua !imisiritaua.” Ikara atokora itxana ninoa. Xesosi Kristonokara aãũite. Apiananiri itxaua. Iuaritika ninoa linirekari Xesosi. Kitxakapirĩka Teoso sãkire iõkatsopatakori sãpiretari Teoso misiritiniri kãkiti ninoa atoko inakani.

<sup>5</sup>Kitxakapirĩka Exito tixini auakani misiritana Xoteoakori. Himarotapekari ikara inakari. Ninirekari iuãkana hĩxinikiniri ikara inakari pirena. Teoso moianatana Xoteoakori, ininiã ninoa miteka, Exito tixini osipikinina ĩkapani. Hĩxinikariko ia: Teoso

makatxakana ninoa iusaaki imapinakanina ikapani, iuaritika mapa kasiriti napa atoko Teoso okana ninoa iua sākire mauiakani.

<sup>6</sup>Ātipekana nisāpiretai. Hixinikariko Teoso nitiriakori iaxitikini kitxakapirīka. Teoso txikitakana ninoa auñtetxi ininiuana, txamari linirekaikarina Teoso paniātakiti ikaminina, ininiā itakanaparina auñiātaāna Teoso tixineñ. Hixinikariko ia: Teoso paniātana ninoa ipiaā ikaikotinina ātipirika. Itixi xipokini ōtisaaki Teoso misiritanako ninoa.

<sup>7</sup>Ātipekana nisāpiretai. Hixinikariko Sotoma sitatxiti, Komoha sitatxiti, apanakini sitatxiti apaka iuaātaā takote auakari. Iuaā auakani linirekari Teoso paniātakiti ikaminina, ninoa Teoso nitiriakori atokokana. Maerekatinoka inirekapikana, kiki sirikini āti kikikata. Ininiā Teoso xipokari iuaā auakari sitatxiniri. Ninoa maerekani xika Teoso iokanatana ninoa arikatxi maxipokatimoni. Iuaā imisiritaākapikana. Ikara ōtākikaua maerekati amakamakani tīkane.

<sup>8</sup>Ninoa maerekati kamakani, kamisirienererini hīte sauaki auakani, kitxakapirīkarini atokokana itxana. Ixiniākitina maerekati xika ninoaka ito imisiritauna. !Inirekarina Teoso ninoa auñte ininiua. Imisākirepiretarina Teoso nitiriakori iaxiti auakani. <sup>9</sup>Mikeo inakori Teoso nitiriakori auñte itxaua, iuaritika !imisākirepiretari āti Teoso nitiri iaxitikiri. Kitxakapirīka iua Mikeo Satanasikata itaparakienatakakaua, kotxi Mikeo nirekari Moisesini ito ikatini, txamari Satanasini nirekari Moisesini ito iua inakiti ikapani. Iusaaki Mikeo !imisākirepiretari Satanasini. Ianoka isākire: “Teoso misiritapanikaiko pite,” itxari Satanasini. <sup>10</sup>Txamari ninoa kamisirienererini hīte sauaki auakani misākirepiretari ikinika imimarotakinina. Ninoa iikite kaxipiri itopa auakani iikite atokokana, kotxi ikamarina iitonani nirečkiti. Ikara iikitenā xipokanako ninoa.

<sup>11</sup>Teoso misiritanako ninoa. Kitxakapirīka Kaiñ inakori kamari maerekati. Iua maerekani atokokana ninoa maerekani. Kitxakapirīka Paraño inakori kamari maerekati txineiro apakapini ikapani. Iua maerekani atokokana ninoa maerekani. Kitxakapirīka Koree inakori linirekari Moisesi iauñte ininiua. Iua atokokana ninoa !inirekari Teoso iauñtetini. Ininiā ixipokaākanako Koree xipokiko atokokana.

<sup>12</sup>Hāpotiitakasaakiua hinipokotini ikapani, ninoa kamisirienererini apaka nipokota hītekata. !Ipētauatana. Itxikotarina iua kiiniri imaerekanina xika. Ninoaka itiretaua. !Itiretarina apanakini. Itima anikari katxiāri iaxitikiri, ininiā katxiāri napiniātaā āparaā kipa,

takari aneini ikapani. Txamari ninoa kamisirienererini katxiãri ãki ãparaã mauakinini atoko itxa. !Erekana kãkiti ikapani. Mitaãsaaki aua txipokori, txamari ninoa kamisirienererini mitaãsaaki aamina mariti atokokana ninoa. Aamina mariti ipĩkari atoko, kotxi !iminaua. Ninoa iua atokokana, kotxi !ikamari erekari. Aamina mariti tokaãka. Ikotsa maporokaãka, ininiã atão ipĩkari itxaua. Ninoa kamisirienererini ikara aamina atoko, kotxi ipinanako. !Ikaikotana Teosokata ãtipirika.

<sup>13</sup>Potxoari uiniti tsakati pamonõkoniri atoko itxa ninoa kamisirienererini. Tsakati sori txiko atoko itxa ninoa maerekani. Iõriki atoko itxana. Iua iõriki sinimoni !kimarotikori. Ninoa sariko ipiãmoni ãtipirika ikaikotinina ikapani. Teoso mereẽri ikara ipiaãtaã ninoa auini ikapani.

<sup>14</sup>Kitxakapirĩka Enoki inakori sãpiretapekari kamisirienererini pirena. Iua Enoki Adão apika mekaniri apika mekaniri itxaua. Enoki txari:

Hãtamatariko. Apiananiri apokako itiximoni itomaneri inakitiakorikata. Mio, apikomoni mio, apikomoni mio, itxaãpokata inakitiakori iuakata ikani.

<sup>15</sup>Iua ikinipoko misiritiko sãpiretakari itxaua. Iua apokasaaki, isãpiretanako maerekati kamakani misiritiko, Teoso manireẽkani misiritiko, kotxi Teoso lipotxitari ninoa kamakiti. Ninoa misãkirepiretapikari Teoso. Ninoa maerekani xika, Teoso imanirekakanina xika, imisiritaãkanako, itxa Enoki sãpiretakiti kitxakapirĩka.

<sup>16</sup>Ninoa kamisirienererini ãtipirika tsoatapika. ãtipirika apoĩtapikana apanakini. Iĩtona nireẽkitinanira ikamana. Iuikauana. “Peerekai pite,” itxana ãtimoni inireẽkitinani apakapinina ikapani.

### Õtãkipirenatxi

<sup>17</sup>Nitiretakini hĩxinikariko aãuĩte Xesosi Kristo iokanatakini sãpiretakiti akokaxiti. <sup>18</sup>Ninoa txai: “Xipokatxi õti kaiaapeka inini manapi apokanako kikiakori hĩte napetakani tĩkane. Ninoa kamariko ninoaka nireẽkiti, Teoso manireẽkiniti,” itxana Xesosi Kristo iokanatakini sãpiretakiti. <sup>19</sup>Ninoa maerekani xika kãkiti txitakakaua. Ninoa kamisirienererini kamari iĩtona nireẽkitinoka. Erekari Matamatakoti !auinana ninoa.

<sup>20</sup>Hĩtepekana nota tiretakini, iteene hãuikapikariko Teoso oereẽkiti. Ikara atoko hininiã, kataparaxinireiko hĩte. Hãuikariko Teoso

oereēkiti, kotxi Teoso sākire itxaua. Himisākiretariko Teoso. Erekarī Matamatakoti oerekai atāo hīsākirauatini īkapani. <sup>21</sup>Maerekati kamakanii, iuaritika aāuīte Xesosi Kristo !imisiritai. Iua anikai ātipirika iuakata hāuini īkapani. Ikara hiātapakasaaki, ātipirika hīxinikapikariko Teoso tiraōki hīte īkapani. !Hītakanapapiri iua.

<sup>22</sup>Apanakini !auikapanikari ikinika Teoso oereēkiti, iuaritika !hītxitapena. Himoianatanako ninoa iteene auikiniri īkapani.

<sup>23</sup>Pamonōkoniri, kākiti kamakasaakiri maerekati. Xamina tirinakari atoko itxa imisiritikona imaerekanina xika. Ininiā hīsāpiretanako Teoso sākire, imisiritikona apokini apisapanika. Xamina tirinakari āki katxakakari pimakatxakini atokokana itxa, pisāpiretakasaakiri Teoso sākire ninoamoni. Apanakinipekana hiamonīkako.

Hiamonīkasaakina, erepaniko, kotxi pamonōkoniri ninoa maerekani. Homanatariko maerekati ninoa kamakiti, hīte makamakaniri īkapani.

### Peerekari Teoso

<sup>24</sup>Teoso kaposotiireri nīkataua maerekati amakamakani īkapani. Iua anikaua iua apisatoō apoxokoniritika. Iuasaakiko amaerekani !auaikako. Peerekari aāuini iua apisatoō. <sup>25</sup>Āti Teoso !auari. Iuanokara Teoso txaua. Iuanokara kimaroreri. Amaerekani makatxakakari itxaua, kotxi aāuīte Xesosi Kristo ipina ate īkapani. Iua iotximere aua, kotxi imaerekani !auari. Auītetxiakori auīte itxaua iua. Kaposotiireri iua. Iposotari ikinipoko ikamini. Itixi kamiko apisapanika ikara atoko itxa Teoso. Uatxa ikara atoko itxapanika Teoso. Ikara atoko itxapikako ātipirika Teoso. Ameē.